



La grupp da Tumegl ha gudagnà il final da la categoria D, quella cun l'arma da militar: Carl Frischknecht, Miguel Sgier, Dirk Frischknecht, Mauro Ardüser e Hansruedi Giger (da san.).



Ils tiradurs da la Val Müstair èn daventads vicecampiuns grischuns sin la distanza da 50 meters: Roman Clavadetscher, Daniel Clavadetscher, Dumeng Fallet ed Elmar Fallet (da san.).



Ils campiuns grischuns da grupp 50 meters, ils quatter tiradurs da Cuvlignas: Duri Schöpf, Hans Hartmann, Guido Zellweger e Peter Strebel (da san.).

Duin ha procurà per la gronda surpraisa

Cuira: Tir final grischun da gruppas

DA GION NUTEGN STGIER / ANR

■ **Cuira e Tumegl èn las societads victoras sin la distanza da 300 meters e Cuvlignas e Cuira quellas duas uniuns che han gudagnà la concurrenza sin la distanza curta. Tratg bain han er las gruppas sursilvanas sin la distanza da 300 meters. Gist 11 gruppas da la Surselva èn sa qualificadas per l'emprima runda naziunala.**

En paucs dis cumenza en il Vallais la Festa da tir federala per ils tiradurs svizzers, segir in dals puncts culminants da la stagiun. Per ils tiradurs da noss chantun è ina occurrenza da gronda muntada gia stada sonda. Il final chantunal da gruppas è en il Grischun il tir dals tirs e quai per giuven e vegl. En cumparaziun cun l'onni passà han ils matscheurs grischuns sajettà pli precis e fatg megliers resultats. Sin la distanza da 300 meters han ils passa 200 tiradurs tratg sonda pli ferm en l'emprima da las duas rundas. Las relaziuns èn ina giada dapli stadadas pretensiusas, ina glisch inquieta e sco adina blier vent al Rossboden.

Nagina grupp sursilvana sin il podest

En il champ A 300 meters Ha ina giada dapli puspè la grupp da Cuira gudagnà. Als tschintg tiradurs èsi tuttina reüssi da far cun 1381 puncts dus puncts dapli che la grupp da Favugn sco defensura dal titel. Suenenter las duas prerundas da chasa era quella grupp rangada sin l'emprim post e per ils tschintg tiradurs ambizius è il segund post en il final bain ina pitschna dischillusiun. Nagina surpraisa è segir er la grupp da Haldenstein ch'è daventada terza cun sajettar cun 1911 puncts be in punct damain ch'ils tiradurs da la Societad da tir Favugn. Cuira, Favugn e Haldenstein, quai èn da preschent segir las uniuns da tir cun tiradurs da la classa superiura. Avant in onni ed er il

2013 avevan ils tschintg tiradurs da la grupp Vorab Ruschein cuntanschi il terz post. Sonda han els betg persvas sco ils davos dus onns e tuttina sco Gavels sa qualificadas per l'emprima runda svizra. Quai è er il cas tar la grupp da Sumvitg, ella che ha manchen-tà sco 4. in plaz da podest per ogt puncts. Las uniuns da tir Laax-Falera, Sedrun-Tujetsch e Castrisch cumpletteschan il quintet sursilvan che vegn proximamain a sa participar a la concurrenza da gruppas svizra.

Danovamain Tumegl

Sa qualificadas per il final dal champ D, arma da militar, avevan 24 gruppas. Da defender il titel aveva la grupp cun ils tschintg tiradurs da la Bregaglia. Quai è dentant betg reüssi als campiuns grischuns da l'onni passà e victurs da la qualificaziun 2015 cun be avair fatg 1311 puncts. Cun quel resultat è la grupp er betg da la partida en l'emprima da trais prerundas naziunalas. Ils tschintg tiradurs da Tumegl èn daventads campiuns chantunals sco gia avant dus onns. En il final da sonda ha Tumegl cunzunt tratg cun 699 puncts ina ferma emprima runda e tschentà cun quel resultat excellent il fundament per la victoria. Vicecampiuns grischuns èn vegnids a Cuira ils tiradurs da Monstein che perdan sin la grupp da Tumegl tuttina 14 puncts.

Duin sa qualificà be stgars per il final

Senza pli grondas ambiziuns èn lura er ils quatter tiradurs e la tiradura da la Societad da tir Duin sa participads al final da gruppas 2015. Sin fundament dals resultats da las duas prerundas grischunas è la grupp da Duin sa qualificada stgars per il final sco 22avla e sco terza davosa grupp da total 24 gruppas. En il grond final chantunal cumenza dentant tut da nov e quella schanza han quels tiradurs da Duin nizzegià. Persvas ha la grupp lumneziana cunzunt en l'em-

prima da duas rundas cun far 683 puncts. Sajettà excellent ha en quella runda *Gion Paul Camenisch* cun far 144 puncts da 150 puncts pussaivels. Be *Andri Krebs* da Sent ha anc fatg quel resultat singul da tuts ils auters 118 tiradurs che han tratg cun ina grupp il final dal champ D. Avant in onni aveva la grupp da Bregaglia procurà cun gudagnar quel final per ina gronda surpraisa. Ussa da preschent è quai stada la grupp da Duin cun terminar il final sin il terz plaz. Quai è cunzunt fitg plaschaivel e fa er bain al tir, betg mo al tir chantunal, mabain er al tir sursilvan. Dasper Duin èn er las gruppas da Val, Castrisch, Ruschein, Signina e Riein-Sevgein da la partida cura che tut cumenza da nov sin champ federal. La concurrenza da las pistolas han danovamain las gruppas favoritas dominà e remarcabel è tuttina ch'ils tiradurs da la Val Müstair han be sajettà il final sin la distanza da 50 meters (2. post) cun betg esser qualificads per la concurrenza da 25 meters.

Resultats

Champ A, 300 m arma da sport
1. Cuira, 1914, 2. Favugn 1, 1912, 3. Haldenstein I, 1911, 4. Sumvitg, 1903, 5. Laax-Falera, 1897, 6. Ruschein, 1891, 7. Sedrun-Tujetsch, 1891, 8. Castrisch, 1890, 9. Haldenstein II, 1878, 10. Tavau, 1869, 11. Fideris, 1867 (quellas gruppas èn qualificadas per l'emprima runda naziunala).

Champ D, 300 m arma da militar
1. Tumegl 1, 1381, 2. Monstein 1, 1367, 3. Duin, 1350, 4. Monstein 2, 1347, 5. Val, 1347, 6. Sent, 1346, 7. Castrisch, 1345, 8. Tusaun, 1339, 9. Tavau, 1338, 10. Ruschein, 1334, 11. Grüşch, 1326, 12. Malix, 1326, 13. Signina, 1324, 14. Cuira, 1320, 15. Roten 1, 1320, 16. Tumegl 2, 1318, 17. Riein-Sevgein, 1314 (quellas gruppas èn qualificadas per l'emprima runda naziunala).

Pistola 25 m
1. Cuira 2, 1103, 2. St. Antönien, 1082, 3. Cuvlignas, 1076.

Pistola 50 m
1. Cuvlignas, 736, 2. Val Müstair, 731, 3. Igis Landquart, 721.



Danovamain sa qualificada per la runda svizra è la grupp da Ruschein en il champ D: Igan Caduff, Fidel Cadruvi, Meinrad Cadruvi, Josef Truog e Tarcisi Cadruvi (da san.).



Per ina giada betg in plaz da podest per la grupp da Castrisch: Robert Studer, Hermann Jemmi, Christian Studer, Jakob Caviezel e Peter Jemmi (da san.).



Adina tranter las meglras gruppas è quella da Sumvitg: Marcus Flury, Paul Wenzin, Otto Bass, Marinus Foppa e Gion Cajochen (da san.).



Quai è l'elita grischuna cun l'arma da sport sin la distanza da 300 meters: Ils tiradurs da Favugn, Cuira e Haldenstein (da san.).